

海防纂要

海防纂要卷之十二

黎陽王在晉明初甫纂男會苾穉芻甫較閱

功令

功次通例

嘉靖十四年議准今後凡遇各邊獲功巡撫官務卽委該道官親詣戰陣地方查勘轉送巡按衙門體勘是實卽便如式造冊四十二年令各處巡按御史今後勘報功次大功限兩月以裏小功限一月以裏不許稽遲隆慶五年題准如遇大舉官軍交戰巡按御史移住近地督併稽查零騎對敵斬獲該道親

臨紀驗是否真正仍查對食糧文冊有無姓名無名者卽係買冒革祿不敘仍行究遣如遇家丁隨征獲功者務審原係何衛所軍民舍餘今頂何軍名糧及將陣亡員役有無兄弟子孫各明註本名脚下造冊一留備照一繳部兵部查覈明實覆請陞賞隨將應陞官旗一面移文該府照舊將勘合徑行各該都司衛所遵照給帖一面備細開咨都察院轉行原勘御史查對原冊相同方准授職以後告併斬首陣亡功級但係年遠不係已名或故祖父名者備查案冊無名卽係詐冒俱不准理 六年題准九邊官軍獲有

擒斬功次本處巡按御史速行覈實一面查收貯庫
撫按贓罰或別項應動銀兩就將願賞者照數給賞
一面速將覈冊奏繳兵部卽行題請陞賞候禮部送
銀到部兵部卽便差官齎送以補前數其一應動支
補還出入之數俱聽巡按御史徑自查理造冊交代
督撫官不許干預巡按先將應動銀兩具數奏知沿
海腹裏地方賞功銀兩原不由內府給發各該巡
按照九邊例一體先行給賞又題准各邊海去處
除係大敵決勝一鼓成功外其陸續零斬功次覈勘
之時寧多擬賞毋多擬陞

凡妄報功次成化二年令官軍妄報冒受陞賞者事
發革去仍降原職役一級調衛差操 十四年申明
官軍人等爭奪擒斬功次者不許紀錄其詐冒功次
者勘問降一級功次不准 弘治十三年奏准臨陣
報有斬獲賊級紀功官從公審驗若用錢買及賣者
俱問罪係官旗卽於本衛係軍卽發邊衛民并軍丁
人等發附近衛俱充軍若虜寇犯邊官兵明知被虜
人口遺棄在彼因而妄殺冒作賊級者與殺平人一
體論斷 凡擅殺平人報功其本管將官頭目失於
鈐束者量所殺多寡輕則降級調衛重則罷職充軍

俱奏請定奪

已上俱

大明會典

倭賊功

一各衛指揮千百戶獲倭船一艘及賊者陞一級賞銀五十兩鈔五十錠在船軍士生擒殺獲倭賊一人者賞銀五十兩陸地交戰生擒殺獲一人者賞銀五

十兩

見會典洪武二十九年

一凡水陸主客官軍民快臨陣斬首有名真倭賊首一名願者陞授三級不願陞授者賞銀一百五十兩獲真倭從賊一名願并陣亡者陞實授一級不願陞者賞銀五十兩獲漢人脅從賊一名願者陞授署職

一級不願陞者賞銀二十兩如在海洋遇賊有能邀擊沉匿船隻或追逐登山使賊不得近港如賊近港有能奮勇堵截使賊不得登岸如賊既登崖有能衝鋒破敵奪其聲勢追出境或逼下船使地方不致被禍或所步兵少而擒斬多者均以奇功論聽總督卽時具題紀功巡按作速勘報超格陞賞

嘉靖三十五年題准

一萬曆四年四月本部覆總督兩廣軍門兵部左侍郎凌題一議征倭水陸各路主客官軍民快人等如遇聚止五百名以上大勢倭賊一鼓蕩平以寡擊衆力戰成功者列爲第一等內擒斬有名真倭賊首

一名願者陞實授三級不願陞者賞銀一百五十兩
獲真倭從賊一名願者止賞銀十五兩獲漢人脅從
一名願者止賞銀五兩各不必議陞如賊數不多易
于取勝獲功者列爲第二等內獲有名真倭從首一
名願者陞實授一級不願陞者賞銀五十兩獲真倭
從賊一名願者賞銀十兩獲漢人脅從一名願者賞
銀四兩各不必議陞若賊分夥流劫及敗後散遁零
星擒斬者列爲第三等內獲有名真倭賊首一名者
賞銀二十五兩不願賞者陞署一級獲真倭從賊一
名願者賞銀五兩獲漢人脅從一名願者賞銀二兩

海國圖志卷之十一
各不必議陞如漢人勾引倭夷爲患積惡著名者其
罪較之有名倭首猶爲深重比照前項擒斬真倭賊
首等則一體陞賞

一萬曆六年九月內本部覆巡撫浙江兵部右侍郎
徐 題自本年以後海洋擒斬倭功不拘外洋登岸
賊至五百名之外船至十隻以上爲第一等所獲有
名真倭賊一名願者陞實授三級獲真倭從賊一名
願者陞署職一級不願陞者賞銀二十五兩若二名
願者陞實授一級不願陞者賞銀五十兩獲漢人脅
從賊一名願陞署職一級不願陞者賞銀二十五兩

賊至三百名之外船至五隻以上爲二等所獲真倭
從賊三名題者陞署職一級不願陞者賞銀三十五
兩如不及數二名題者賞銀二十兩一名題者賞銀
十五兩獲漢人脅從賊三名題者賞銀二十兩二名
題者賞銀十五兩一名題者賞銀十兩若賊不過數
十人船不過一兩隻及敗後散遁零星擒斬者獲有
名真倭賊首一名題者賞銀二十五兩不願賞者陞
署職一級獲真倭從賊一名題者賞銀十兩獲漢人
脅從賊一名題者賞銀五兩諸色人等冒功買功者
悉照律例問遣

一議倭功等第查得 會典倭功擒斬陞賞俱照擒
斬北虜事例後嘉靖三十等年倭寇猖獗又定爲登
峴賞格視 會典反加萬曆四年六年議始定爲三
等但中間輕重失倫混淆無次合無將前項功次通
融議擬以後如賊七八百人以上至千人船十餘隻
以上至二三十隻擒斬有名大賊首如先年王直毛
海峰曾一本林鳳之類每一名願陞實授三級不願
陞者賞銀一百五十兩擒斬真倭從賊一名願者陞
實授一級不願陞者賞銀五十兩擒斬漢人脅從賊
一名願者陞署職一級不願陞者賞銀二十五兩若

二名顆者當一級以上爲第一等須賊勢大舉血戰成功者方許開列其餘不得擅擬賊至三百人之外船至五隻以上擒斬賊首一名顆者陞實授一級不願陞者賞銀五十兩所獲真倭從賊一名顆賞銀十五兩每三名顆當一級不及數者給賞不陞所獲漢人脅從賊一名顆者賞銀十兩多者加賞不陞以上爲第二等須對陣擊殺兩相鏖戰者方許開列如賊不過百餘人般不過一兩隻賊首不過是一船主非巨賊也能斬獲一名顆者賞銀十五兩真倭從賊二名顆者十兩漢人脅從賊一名顆五兩通不議陞以

上爲第三等著爲定例

萬曆十二年題准

中傷功

一凡官軍陣傷聽將沿身某處所傷瘡口長濶淺深分寸從實開報紀功官處不許將舊傷冒作新傷候驗實紀錄臨期定擬輕重等第奏請陞賞如無紀

功官員開報鎮守總兵巡撫官處公同驗實總於巡

撫處造冊奏繳行令巡按御史覆勘相同陞賞

兵部題准

一重傷回中身故陞署一級不願陞者賞銀十五兩

兵部題准

倭賊領軍功

一征剿倭賊領軍官部下獲功如武將自守備把總以下文官自海防民兵同知以下所領軍民兵勇五百名部下臨陣擒斬倭級每五名題陞一級十名題加一級領兵一千名部下擒斬每五名題陞署一級十名題陞實授一級各以則例遞陞至三級而止

題
部

一萬曆四年本部題一議海洋功次各領兵官若所獲之功係稱第一等者都司遊擊以上官當時身親督陣部下斬獲一百顆以下卽爲奇功陞署一級三百名顆以上陞實授一級守備千把總以下官部兵

七百五十一
七
五百名擒斬每五名顆陞一級十名顆加一級部兵
一千名擒斬每十名顆陞一級二十名顆加一級至
三級而止俱准世襲不及前數者不陞各項真正奇
功方與勘錄零星功次不許混入奏數

一萬曆四年本部題議領兵官都司遊擊守備以上
仍前不許報功若把總以下將領果能身先士卒破
敵摧鋒斬獲首功爲衆知見者准與照級陞賞

軍職獲功贖罪

一軍職爲事問擬充軍已到衛所收伍奉文立功贖
罪者指揮擒斬四名顆千戶二名顆百戶二名顆俱

准贖罪仍復本職若指揮獲功三名願者止得復副千戶獲功二名願止得復試百戶指揮千百戶各獲功一名願俱准贖罪開伍不給冠帶許回原衛所開住愿在邊方立功者聽若係領兵部下獲功每五名願亦准一級本身不許報功此外已經揭黃永不襲替及犯永遠充軍次房已襲祖職者並不許援此爲例朦朧准贖致紊選法如未經發遣着伍奉文立功贖罪亦照前擬各遞加一名願方許贖罪復職若犯調衛并立功贖罪不拘已未發遣如烟瘴衛所親自擒斬二名願附近衛所並立功徒罪一名願俱准贖

罪回衛還職不許輒自奏告赴邊方立功以撓國法

一議充軍獲功贖罪查得邦政條例一款軍職爲事問擬充軍已到衛所收伍奉文立功贖罪者指揮親自擒斬四名願千戶三名願百戶二名願俱准贖罪仍復本職若指揮獲功三名願者止得復副千戶獲功二名願者止得復試百戶指揮千戶百戶各獲功一名願俱准贖罪開伍不給冠帶許令原衛所閑住愿在邊方立功者聽若係領兵部下獲功每五名願亦准一級本身不許報功此外已經揭黃及犯永遠

充軍次房已襲祖職者並不許援此爲例朦朧准贖
致紊選法如未經發遣着伍奉文立功贖罪亦照前
擬各遞加一名顙方許贖罪復職夫終身充軍果能
臨陣斬首計數多寡止應開伍或復職回衛乃今旣
得開伍復職往往又冒買賊級必候加陞方回原衛
是發遣之明例反爲陞官之捷徑也永遠充軍贖罪
原指未經發遣奉有明文者而言乃今不分已未着
伍曾否奉有明文一槩通同將領詐冒功次朝方着
伍夕卽寧家是永戍之重法反爲脫罪之倖門也合
無今後軍職問擬終身充軍已到衛所着伍立功者

俱照舊例贖復原職外其獲功多者止加筭加賞不
許再行議陞永遠充軍不拘已未發遣一槩不准贖
罪若果有勇力超衆真能臨陣被敵擒斬有功者候
巡按御史覈實照軍人斬首事例以次加陞卽註充
發衛所不許援引終身軍例告回原籍

萬曆十二年題准

旗舍民兵人等獲功贖罪

一旗舍餘丁民兵人等爲事問擬充軍立功徒罪不
拘已未發遣奉文立功贖罪者如永遠充軍親自擒
斬三名顆終身軍二名顆立功徒罪一名顆俱准贖
罪開伍餘照例加陞若舉監生員吏典有犯充軍立

功徒罪照依前擬止准贖罪開伍功多照例扣賞永不許復役

陣亡功

一一家陣亡二三人者陞二級

見會典永樂四年

一父在而子孫隨軍陣亡別無應繼者陞其父二級

見會典景泰四年

一擒斬賊級爲首并陣亡者俱陞一級給賞

見會典

天順元年

一夜不收出境哨探被賊殺死者陞賞依陣亡例奪去馬匹免追

見會典成化六年

一官軍陣前當先殿後斬將奪旗斬賊首等項立有
奇功後又陣亡者子孫襲陞三級仍立祠加祭廕子
若止是衝鋒陣亡生前不曾立有奇功者襲陞二級
如不係衝鋒破敵止照陣亡事例襲陞一級見成化十四年
一諸司職掌凡武官没于王事照依生前職事加
贈二等死于鋒鏑者照依生前職事褒三等

一陣亡官員與哨探被賊殺死夜不收墩軍人等但
陞一級如不願陞者賞銀三十兩陣亡年遠該陞二
級准與一級該陞一級准與終身冠帶及都指揮陣
亡只與襲指揮使都指揮以上流官不准襲陞文官

陣亡許令兒男入監肄業

成化十四年題

臣

一嘉靖七年該工科給事中夏言等題本部覆若親叔兄弟原無祖職自立軍功累至指揮而陣亡者例該加陞流官一級若無子承繼其兄弟叔侄既得承襲之官又得加流之職委無太過合無今後凡弟侄承伯叔兄職事除祖父原有官職者照舊加陞其伯叔兄弟自立軍功累至指揮使以上陣亡者應襲之人止許承襲指揮使本身加贈一級係都指揮陣亡者仍加祭一壇永爲定例其褒贈賜祭臨時酌量上請定奪奉 聖旨是准議行

一都指揮及指揮使陣亡者承襲之人不拘子孫弟
侄只襲祖職止於指揮使若原職指揮使以下軍功
有應減革者准加筭疊陞貳望指揮使而止

十五年題

准

嘉靖二

一嘉靖三十六年本部題看得浙江溫州衛舍人祁
雲龍伊父祁嵩原襲指揮使爲事叅降指揮僉事又
爲事叅問立功今陣亡奉有前項 欽依應襲兒男
襲陞世襲二級本舍係嫡長男保送前來今將本舍
照例於祖職指揮使上加伊父陣亡二級與襲都指
揮同知以後子孫襲替仍照前例止許承襲祖職指

揮使奉 聖旨是

一議得夜不收類皆極貧雖親自斬首多不願陞止
求給賞若孤男寡婦得數十金爲糊口聊生之需合
無將出境哨探被賊殺死夜不收有子孫不願陞者
卽時賞銀三十兩

嘉靖三十一年本部題

准

一查得先年棗強知縣段豸與大勢強賊劉七等對
敵被賊殺死奉 世宗皇帝聖旨段豸率領民兵登
城禦賊親冒矢石不避難險賊已剉剗但衆寡不敵
力盡被害義烈可嘉特贈太僕寺少卿與祭一壇仍
着有司立祠春秋祭祀還廕他男一人做錦衣衛世

襲百戶欽此 又查得崇明縣知縣唐一岑領兵迎戰倭賊殺死節奉 聖旨唐一岑死事可憫准贈光祿寺寺丞立祠廕子准行欽此俱經通行欽遵外該本部議得知縣王鈇叅政錢泮身統孤兵手刃逆賊忠貫金石氣作江河見危授命其志可憫等因題奉聖旨這各官奮不顧身追賊敵戰死事可憫王鈇贈太僕寺少卿錢泮贈光祿寺卿各賜祭一壇還各廕一子與做錦衣衛世襲百戶立祠依擬行

嘉靖三十四年題

一自嘉靖三十二年以後至四十二年以前凡係家丁名色陣亡除應襲子孫照舊襲陞外若以伯叔弟

臣冒併者候襲替之日一體查革其未經併陞者雖
係陣亡之人嫡親子孫亦不准併蓋武職襲替違限
十年之外例尚革發況此陣亡年久必係故絕尤當
盡爲註銷

萬曆元年題

准

一萬曆四年十月內本部尚書譚 題內開稱同一
陣亡而陞襲事例或與或不與却有不同指揮使以
下子孫得延襲無論矣副總兵以上近得比例廕一
次男 恩典頗隆遵照有據獨指揮使陣亡陞級謂
其爲流官而不准世襲其間奉有 欽依世襲字樣
者亦止許襲一輩以後通行查革是在指揮同知下

速卒伍陣亡者皆以世官得襲在副總兵總兵則以
流官得破格優恤獨此指揮使應襲陞都指揮者拘
於流官不世襲之說豈其官階之崇而死顧不足恤
耶情既未通法亦欠備合無將先年事例稍加參酌
遇有指揮使挺身赴敵殞於陣前除給本身恤典及
長男承襲祖職外仍取次男一人與做冠帶總旗查
係生前有功死難獨慘者與做試百戶俱世襲如無
次男卽取長男下次孫承襲奉 聖旨是

一萬曆五年四月本部尚書王 題 准是今以後
旗軍舍餘人等陣亡有子者照例陞補無子者北照

武職事例追贈一級舍餘軍丁追贈冠帶小旗小旗
追贈冠帶總旗總旗追贈試百戶其同籍兄弟叔侄
不論親疎俱不許併加陣亡之級

一萬曆十七年五月內本部題一議指揮陣亡查得
弘治十六年題 准指揮使陣亡者子孫准襲陞都
指揮僉事流官一輩以後查革又查得萬曆四年本
部題 准指揮使挺身赴敵殞於陣前除給本身恤
典及長男承襲祖職外仍取次男一人與做官帶總
旗查係生前有功死難獨慘與做試百戶如無次男
卽取長男下次孫承襲二例竝載向未歸一及查指

揮同知以下陣亡者止陞世襲一級今指揮使陣亡
另取次男授總旗則二級試百戶則三級似加恩太
過若有次男止長男陞襲都指揮僉事似報功太輕
合無酌議以後指揮陣亡止有長男長孫者仍止襲
陞都指揮僉事一輩若有次男次孫另陞一人與做
小旗其生前有功死難獨慘與做冠帶總旗俱准世
襲若本枝故絕前枝止襲祖職其陣亡加授不得另
襲已上俱那政條例

優恤成規

一斬獲首級功多于陣亡有的祖父母妻子者每名

負銀八兩止有伯叔兄弟房族者賞銀四兩

一斬獲首級功少于陣亡有的祖父母妻子者每名賞銀四兩八錢止有伯叔兄弟房族者賞銀二兩四錢

一全勝收功遇有在船在營出戰損失兵士一名與功多例賞

一全然無功反被焚溺殺死謂之敗兵每名不論有無親人賞銀三兩二錢

一戰而有功重傷幾死者每名賞銀三兩二錢無功重傷者賞銀一兩六錢

一戰而有功輕傷者每名賞銀一兩六錢無功輕傷者不賞

一陸營出汛遇有操演哨探銃砲失馬悞傷因而致死得真者每名賞銀一兩六錢

一水兵出汛會哨卒遇風濤不測致有損失每名賞銀一兩六錢

已上係都御史高

批九按察司議

禁下海通番律例

私出外境及違禁下海

凡將馬牛軍需鐵貨銅錢段疋紬絹絲綿私出外境貨賣及下海者杖一百挑擔馱載之人減一等物貨

船車並入官於內以十分爲率三分付告人充賞若將人口軍器出境及下海者絞因而走世事情者斬其拘該官司及守把之人通同夾帶或知而故縱者與犯人同罪失覺察者減三等罪止杖一百軍兵又減一等

大明律

一洪武二十二年令守禦邊寨官軍如有假公事出境交通及私市易者全家坐罪

會典

一凡守把海防武職官員有犯受通番土俗哪噠報水分利金銀物貨等項值銀百兩以上名爲買港許令船隻私入串通交易貽患地方及引惹番賊海寇

海防纂要 卷之十一
出沒戕殺居民除真犯死罪外其餘俱問受財枉法
罪名發邊衛永遠充軍

一凡夷人貢船到岍未曾報官盤驗先行接買番貨
及爲夷人收買違禁貨物者俱發邊衛充軍

一凡沿海去處下海船隻除有號票文引許令出洋
外若姦豪勢要及軍民人等擅造二桅以上違式大
船將帶違禁貨物下海前往番國買賣潛通海賊同
謀結聚及爲嚮導劫掠良民者正犯比照謀叛已行
律處斬仍梟首示衆全家發邊衛充軍其打造前項
海船賣與夷人圖利者比照私將應禁軍器下海因

而走泄事情律爲首者處斬爲從者發邊衛充軍若
止將大船雇與下海之人分取番貨及雖不曾造有
大船但糾通下海之人接買番貨與探聽下海之人
番貨物來私買販賣蘇木胡椒至一千斤以上者俱
發邊衛充軍番貨並入官其小民撐使單桅小船給
有執照於海邊近處捕取魚蝦採打柴木者巡捕官
旗軍兵不許擾害

一私自販賣礮黃五十斤礮硝一百斤以上者問罪
硝黃入官賣與外夷及邊海賊寇者不拘多寡比照
私將軍器出境因而走泄事情律爲首者處斬爲從

者俱發邊衛充軍若合成火藥賣與鹽徒者亦問發邊衛充軍兩隣知而不舉各治以罪

一凡官員軍民人等私將應禁軍器賣與進貢夷

人圖利者比依將軍器出境因而走泄事情者律斬爲從者問發邊衛充軍已上係問刑條例

一凡沿海軍民私往倭國貿易將中國違制犯禁之物餽獻倭王及頭目人等爲首者比照謀叛已行律斬仍梟首爲從者俱發烟瘴地面充軍

一凡姦民希圖重利夥同私造海船將紬絹等項貨物擅自下海船頭上假冒勢宦牌額前往倭國貿易

者哨守巡獲船貨盡行入官爲首者用一百斤枷枷號二箇月發烟瘴地面永遠充軍爲從者枷號一箇月俱發邊衛充軍其造船工匠枷號一箇月所得工錢坐贓論罪

一凡豪勢之家出本辦貨附奸民下海身雖不行坐家分利者亦發邊衛充軍貨盡入官

一凡歇家窩頓奸商貨物裝運下海者比照竊盜主問罪仍枷號二箇月隣里知情與牙埠通同不行舉首各問罪枷號一箇月發落

一凡關津港口巡哨官兵不行盤詰縱放奸民通販

倭國者各以受財枉法從重究治

一凡福建浙江海船裝運貨物往來俱着沙埕地方
更換如有違者船貨盡行入官比照越渡沿邊關塞
律問罪其普陀進香人船俱要在本籍告引照身關
津驗明方許放行違者以私渡關津論巡哨官兵不
嚴行盤詰者各與同罪

已上係刑部議覆新例萬曆四十年六月題准

考察

一考察官捕查得寧紹二區水陸各營哨官捕盜耆
民隊什長爲兵軍領袖必須誠實精壯者充之庶克
有濟該副使劉訪得各役因循積弊踵襲利規中

間守法者固不盡無其虛兵冒支暗糧侵盜放債賭博扣剋賣閑恃倚束兵指一科十種種奸弊不可勝言以致老弱瘋病之人互相蒙蔽坐食廩糧就經行據各總呈解前來逐名點閱考察除事犯稍輕者量行資成姑准留用令其省改有顯過者重責與老弱疾病者一體革退另換其過惡多端者發府究問以後每年防過大小二汛畢日一體送考通行備由於萬曆元年十一月內呈奉督撫軍門方巡按御史蕭批准著爲定規每年防過二汛一體取考向在遵行

一考察官捕查得沿海各區水陸官目每年於防汛
畢日聽海道鎮叅會同考察賞罰以昭勸懲續於萬
曆十五年爲酌考察以便訓練事奉督撫部院溫
憲牌自後俱三年大汛畢通行考察近又奉明文每
汛期軍門撫臨行取官目賢否文冊考覈至汛畢日
聽候詳示分別去留并應戒應拏等項遵行在卷

萬曆三十八年六月浙江督撫軍門高 爲軍務事
照得大汛旣畢往年例將各官役彙行考察分別汰
革戒飭本院看得兩汛畢日有年終舉刺賢否已經
確訪不數月而課殿隨之不但人人自危無以圖無

固志而多視亦能亂明多訪適以亂聽是身一事不
若省一事之相安也合行遵照并行申飭解仰該道
移行兩將官曉諭各總哨等官精勇隊什等役使知
本院體恤至意素著賢能者務要愈加激勵一乃心
力以期有功卽偶有微疵小過者務宜猛然省改克
盡前愆以圖後効免行一番訪察儻有過蹟顯著或
違禁需索指官科斂爲營伍蠹及疲弱老疾掛名充
數佔役冒餉罔裨行伍者該道時常體訪據實不時
揭報以憑究革又未可以姑息養奸儻不肖者或恃
法疎而肆志本院別有所聞定從重處斷不假借俱

毋違錯

今止年終甄別舉刺
汰革汎舉免考察

輯祭禱說

王鳴鶴曰禮制有五軍居其一蓋上而社稷下而生靈安危存亡實係焉斯其所關於國家至重也故禡牙之禮始于王制歷代以還凡有軍興莫之敢廢非爲瀆祀非爲誚神爲社稷生靈重厥典爾前代舉行未暇悉考恭覩我二祖開基定鼎之後大蘇神旗歲時有祭載在會典國憲昭然及虎鈴武經所載祝告之詞類各不同俱有成式乃備輯茲篇以便仗鉞專征者遵行毋忽云且易有之聖人以神道設教

夫幽顯殊途而感孚則一耿恭拜井而井涌孔明祭
風而風應卒以解城中之圍奏江上之捷非特感格
乎神明而亦以鼓舞乎衆志機則然也司寄者其尚
審之哉

出軍誓衆文

有虞氏誠于國夏后氏誓于軍商人誓于軍門之外
周人將交外而誓所誓不同吾從周之誓曰惟天至
仁亭毒萬物其有逆於道德者激霆以震之惟神至
幽游息六氣其有淫於禍亂者潛靈以殛之惟王至
明順卹九服其有悖於教化者興師以察之此其同

條而共貫者也是知君天下者揮長戈以賓不臣未
爲不善也滌穢滓以廣王化未爲不嘉也今孽虜不
庭亂常反德吾爲天子恭行天討誓剪大憝決垂元
功旣出凶門已卽敵境咨爾衆士用命賞于祖弗用
命戮于社生死榮辱在是一舉勿使自蹟爲邦之羞
爾其勉之爾其勉之

軍祭

咸平四年詔禮官詳定禡于所征地之禮付北面總
管其禮除地爲壇以祠黃帝軒轅氏用羊豕代太牢
都總管爲初獻餘用舊儀其牙神纛神兵以一少牢

其幣牙以白纛以皂用剛日以漆器當饌祠之於墀

統以青繩覆以幄幕

置軍牙大纛位方七寸厚三分

亦三獻設以

一豕祠官皆戎服清齋一宿舊法兼祭風師祭雨師

祭馬師其薦獻亦用牲牢酒脯香幣如上儀惟風師

磔犬以爲牲祝文曰維某年某月某日將師具官稱

姓名某以某物之奠致祭于某神凶黨首難干紀亂

常毒流生民罪在不赦受命徂征恭行天討殄寇克

敵惟神是助尚饗

一說祭毘沙明天王有祠貌則就其祠無祠則望北爲位設香燈蘋

泉漫楊枝乳燕酥蜜餅食之屬

三軍首路之日則祭道路神以車犯

較

祭禮放城外之首路封土爲山形蒲芻棘栢爲神主祭儀牲幣皆准上

祭畢以車轆

之而過謂之犯較軍在道路凡遇名山大川百神祠廟皆遣官以酒脯祭告

醫藥類

凡行兵出遠方爲風雨所侵頃刻發寒發熱頭痛拘攣再胗其左手人迎脉大如氣口此係外感無疑須用後方二三劑以表其風邪必使汗出如雨直至脚上有汗次日熱退身凉切不可喫飲食不則再服二三貼卽愈

發表方

防風

二錢
去蘆

蔓京子

二錢
研

撫芎

三錢

荆芥

二錢

乾葛 二錢

明天麻 三錢

升麻 一錢五分

知母 二錢

薄荷 二錢

甘草 一錢

半夏 二錢

分三貼每貼姜三片葱頭三箇水二鍾煎八分食

遠熱服查再煎

治瘡疾初發服此方四五日即愈

紫蘇 四錢

青皮 三錢

蒼朮 四錢

半夏 四錢

乾葛 五錢

香附子 三錢

川芎 四錢

陳皮 三錢

分五貼每貼姜三片葱頭三箇水二鍾煎八分食

遠熱服忌魚腥生冷等物

治痢疾初發方

柴胡

二錢 去蘆

枳櫚

二錢

白芍藥

二錢 酒炒

木通

二錢

車前子

二錢

黃芩

二錢 酒炒

川黃連

二錢 姜炒

甘草

一錢

陳枳壳

二錢 麸炒

分三貼每貼姜三片燈心十根水

二鍾煎八分食遠溫服忌油膩生冷等物

此方遇痢疾初發之時服此數貼以分利水穀輕者即愈必須以積滯俱止乃可或服此更重乃是暑濕非此藥所能愈宜服後方

川黃連

五錢 去毛

川大黃

八錢

白芍藥

七錢

朴硝

四錢

分三貼姜三片水二鍾煎八分通口服服此三貼以大便瀉去積滯為度不拘紅白積俱是熱毒並

以此藥治之無疑

服前方分利并瀉藥久不盡愈者宜服此方三四貼以調胃養血爲主無不大効

川黃連

三錢

白芍藥

三錢

川當歸

二錢五分

白朮

三錢

人參

三錢

木通

二錢五分

陳枳壳

二錢五分

甘草

一錢五分

車前子

三錢

分四貼每貼姜三片燈

心十根水煎溫服

已上係建德唐鑑定方

疫氣諸病捷說

古者行軍必急醫藥蓋結營必依山川每犯山嵐海氣兼之霜雪風雨奔走罷勞沍寒酷暑野屯露宿衆

人氣穢交蒸疫病易起不服水土霍亂虐痢愴悻有
病不暇安卧調理必須預備藥餌藥雖數種醫者須
擇隨營聽用審証診脉變通加減引而長之可以應
變無窮用之有法投一七則起一人十七則痊十人
是亦臨戎不可缺者也

治法

疫病初起一二日頭疼身熱骨節疼用芎蘇散發散
而愈若兼有飲食停滯嘔吐等症用藿香正氣散
芎蘇散 治疫病頭疼身熱骨節痛傷風等症

川芎

十兩

紫蘇

一斤

陳皮

十兩

茯苓

十兩

甘草

十兩

乾葛

二十兩

半夏

十兩

柴胡

二十兩

枳殼

十兩

桔梗

十兩

香附

炒十兩

冬加麻黃白芷

各八兩

共為末每

用兩許一七姜葱湯送下衣覆取汗

藿香正氣散

治四時不正之氣寒疫時氣山嵐瘴

氣雨濕蒸氣或中寒腹痛吐利中暑冒風吐瀉中

濕身重不伏水土飲食停滯嘔吐無汗等症

藿香

二十兩

蒼朮

一斤

厚朴

一斤

陳皮

一斤

半夏

一斤

茯苓

一斤

白芷

一斤

桔梗

一斤

紫蘇

一斤

甘草

十兩

大伏皮

一斤

共為末每用一兩七姜湯下

霍亂

暑月霍亂益元散涼水調灌

冬月炒鹽湯

灌之 因食霍亂霍香正氣散主之 中寒霍亂

吳茱萸 鹽炒 煎服再用茱萸煎熨臍下

益元散

滑石 六兩 甘草 一兩 共爲細末

萬疾解毒丹

山茨菇 去皮洗焙二兩 文蛤 一名五倍子槌破洗焙二兩

千金子 去壳揀色白者紙包研去油成霜一兩 紅牙大戟 一名紫大戟洗焙一

兩五 麝香 三錢研

右製法宜端午七夕重陽或天月德黃道上吉日修合量藥多寡預期數日前主人及醫者俱齋戒

沐浴於靜室焚香將前五味各爲極細末重羅兩遍依方用糯米濃飲調和干木臼內杵千下極光潤爲度每錠重一錢每服一錠病勢重者連服通利一兩行用溫粥補住治一切飲食藥毒蠱脹瘴氣惡菌河豚死牛馬駝羸等諸毒並用凉水磨服南方蠱毒瘴癘傷人纔覺意思不快卽磨服一錠或吐或利隨手便愈癰疽發背對口天蛇頭無名疔瘡楊梅等一切惡瘡諸風隱疹赤腫未破及痔瘡並用無灰淡酒磨服及用凉水調塗瘡上日夜各數次覺痒立効

已上俱登壇必究

兵瘴

凡屯兵聚衆停住多時氣息相蒸遂成疾病徃徃死者十有百數此名兵瘴用之常藥更不能治余別得法并治藥方萬不一失

治瘴方

用髑髏三枚當處燒之令軍卒聞其臭氣入鼻其瘴自退

又方

取骷髏燒灰細研用冷水調服一錢卽愈

又方

取髑髏共青布等分燒烟薰鼻中待惡水滴盡卽愈

疫瘴不染方

凡欲入病人家先以水磨雄黃塗兩鼻孔雖與病者同牀亦不傳染如倉卒間無雄黃觀病人出後卽以紙條噓去鼻中毒氣亦不害

治時氣病方

取頭髮燒灰存性共猪脂和服二錢卽愈凡燒灰存性須去不淨頭髮

療渾身腫方

取馬糞蒸令微熱覆於身上卽痊

又方

用鹽於腫身塗之

治中刀鎗血出不止

剪牛馬毛燒灰存性敷之立止

軍中倉卒無藥其餘藥物術數蓋非軍中急得此乃
兵家之妙術也

已上俱神機制敵

折傷金瘡說

夫折傷者謂爲物所傷於身體或犯刀斧或墜墮險
地或爲撲跌傷筋挫骨損皮破肉遂致傷生有死血

出不止者有瘀血停積於臟腑結而不散者治之不早則有入腹攻心之患不可勝言凡遇前症當視所傷輕重如皮未破而內損者必有瘀血停積先宜逐去瘀血然後和血止痛若肌肉裂破流血過多者宜調氣養血兼補脾胃爲主大抵失血之脉沉細者止實大者死初傷之時切不可飲冷水亦不可食熱物蓋血得寒則凝滯得熱則妄行至于所忌暴怒勞力過飲房勞悉皆慎之一不慎則未有不死者矣

寸金丹

天花粉

三兩

姜黃

一兩

赤芍

二兩

白芷

一兩

石爲末此一方治金瘡重者筋斷脉絕血盡人亡
須用繩索及絹帶扎處血路然後用此藥以茶清
調敷用軟絹縛之其血立止其腫頻消若金瘡着
水番花者可用薤汁調敷瘡口兩傍以火微炙之
或用稻稈烟薰之瘡口水出卽愈

百草丹 治金瘡

五月五日平旦使四人出四方於五里採一方草
木莖葉每種各半把勿令脫漏一葉日午時細切
碓擣令極爛仍先揀好石灰一斗同杵之復選大
實樹三兩株鑿十竅令可受藥然實于竅中緊閉

之畢用麻油搗石灰密泥不令泄氣更以桑皮纏定令牢到九月九日午時取出陰乾百日藥成搗之曝令極乾更搗用絹羅之凡有金瘡傷損血出用藥封裹勿令轉動十日卽瘡矣不腫不膿不畏風若傷後數日始得藥須先用溫水洗令血出卽敷之此藥大驗如神預多合之金瘡之要無出之者

治金瘡并木石傷損

用好陳石灰六兩研碎篩過錦紋大黃一兩切塊同石灰鍋中炒過紫色爲度去大黃再篩過敷傷

處立効

止痛生肌散 治刀斧傷出血不止

乳香 沒藥 兒茶 桑皮 炒 龍骨 水飛 石

膏 煨水飛 黃丹 水飛 真三七 各等分 爲末 搽之立止

當歸導滯湯 治重物壓傷或高處墜下或吐血不能禁止或刀箭所傷瘀血在內胸腹脹滿喘促氣

短

當歸 大黃 各二兩 共爲末 每服二錢 不拘時 童

便和酒調服

弓歸湯 治去血過多昏暈等症

川芎

五錢

當歸

一兩

共爲片水煎臨服入童

便酒各一大盃熱下

又方

治金瘡折傷不問輕重以童便一碗入酒半

一碗煎沸溫服以防惡血攻心之患

不飲只用童便

金瘡藥

用馬齒莧韭菜根連須葱陳石灰共調搗

爲餅子陰乾爲末乾摻其血卽止

又方

用白馬糞不拘多少曬乾爲末凡遇刀斧所

傷乾摻其血卽止

葱搭法

治撲損傷腫痛

用葱頭切爛炒焦搗搭患處冷則再易止疼消腫

散瘀

治殺傷不透膜者

用乳香沒藥各一錢研爛以小便半盞好酒半盞同藥通口服然後用花蓋石散或烏賊魚骨或龍骨爲末傅瘡口上立止

治金瘡內爛生蛆者

右以皂礬飛過爲末乾摻其蛆卽死

治金傷肚腹腸出者

右以避風處用麻油潤手安腸入內以桑皮作線縫之更以熱雞血塗上一夜次用止痛生肌散或

花蕊散敷貼仍用磁石三兩燒紅醋淬七次搗碎
研如粉滑石三兩鐵精三兩右爲細末研勻每服
一錢七分溫酒調下日進三兩服

治藥毒箭頭在身不出

雄黃

細研一分粉霜

細研半兩

蜣螂

四兩研末生用

巴豆

三粒去皮壳別研如泥生用

右同研勻以銅筋頭取乳

汁塗點瘡上頻頻用之次日瘡熟箭頭自出

又方 治毒箭所中

右搗藍葉汁一升飲之渣傳瘡上若無藍取青布
漬絞汁服之并淋瘡中鏃不出搗鼠肝塗之鼠腦

亦得用之卽出

治箭頭不出方

蜣螂

自死者
十箇

土狗子

三箇婦人髮灰

少許

右將蜣螂

去殼取白肉與二味同研如泥用生塗中箭處如膏塗後內微痒卽以兩手感之其箭頭自出

治骨中箭頭方

雄黃

一分

蜣螂

一分

石灰末

一分

牛糞

火燒令赤

威靈仙

一分

朝桂鼠

一枚去
頭取血

右爲末入鼠血并煉

蜜丸如黃米大納瘡口中其箭頭自出

又方

治骨中箭頭

巴豆

一枚去壳

膩粉

一分

砒霜

許少

磁石

半兩細研

蜣螂

一枚

右爲末以雞子清和丸如菉豆大用生男子乳汁化一丸撥在破處上用醋麵紙封貼常痒痒極不可忍其鏃自出多年者兩上當年者一上鏃卽出

破傷風論

破傷風者先有破傷風邪襲入瘡口其症大似傷寒而瘡口驟結白痂是其驗也或發熱或寒熱間作甚則口噤目邪身體彊直如角弓反張之狀死在旦夕矣法當同傷寒處治因其有在表在裏半表半裏三者之不同故不離乎汗下和三法也是故在表者汗

之在裏者下之在半表半裏之間者宜和解之又不可過其法也

羌活防風湯 治破傷風邪初傷在表

羌活 防風 川芎 藁本 當歸 白芍 甘

草 各四兩 細辛 地榆 各二兩 右咬咀每服各

一兩水二盞煎至一盞去渣溫服不拘時量緊慢加減用之熱加黃芩二兩便秘加大黃一兩緩緩利過

奪命散 治破傷風如角弓反張牙關緊急

天麻 白芷 川芎 去皮各二錢 早烏 雄黃 各一錢

右爲末酒糊丸如桐子大每服十丸溫酒送下

定風散 治被傷風牙關緊急

天南星 防風 石爲細末破傷以藥敷瘡口然

後以溫酒調一錢服如牙關緊急角弓反張用藥
二錢童便調下

行軍烟火所傷

凡遇烟火所傷切不可用冷水冷物熱得冷氣則却
擊搏爛人筋骨慎之慎之 一方用麻油浸黃蜀葵
花付上 一方用爛黃柑汁塗之 一方用多年白
螺螄殼火煨爲末瘡破乾摻不破清油調敷 一方

用側栢葉搗爛付上 一方用寒水石大黃黃栢各等分爲末蜜調敷之

冬月手足皸裂

凡士卒冬月涉水一切風雪凌凍所苦手足面目皸瘃血出一方用清油半兩以慢火煎沸入黃蠟一塊同煎候溶入官粉五倍子末少許熬令稠紫色爲度先以熱湯洗火上烘乾卽用藥敷上以薄紙貼之一方用瀝青一兩黃臘一兩共熬攪勻瓦罐盛貯先以熱湯洗令皮軟拭乾將藥用慢火略烘溶付之一方用茄子根濃煎湯洗過以黃丹爲末猪油調付

救五絕死

一救溺水死者用皂角爲末綿裹塞糞門放大癸卧
着脚後癸墊起一二磚用鹽擦鼻中待水自流出切
不可倒提出水但心下溫皆可救 一方急解衣帶
艾炙臍中令二人以蘆管吹其耳中卽活

一救木石壓死并從高跌死氣絕不能言者取藥不
便急擘開口以熱小便灌之 一方豆豉一大盞水
兩碗煎三沸去渣服

一救夏月途中熱死者不可用冷水灌沃及以冷物
逼外得冷卽死宜移置陰處急取路上熱土於死人

臍上作窩多令人尿溺於臍中又取路上熱土并大蒜同研爛水調去粗灌下

一救冬月凍死及落水中凍死微有氣者脫去濕衣解生人熱衣包之用大米炒熱熨心上或炒竈灰令熱以囊盛熨心上冷則緩之令煖氣通溫以熱酒或姜湯或粥飲少許灌之卽活

一救中百毒急死用甘草同黑豆煎湯灌之 一方以麻油灌之 一方以芫荽根搗爲汁半盞和酒服之

已上俱登壇必究

海防纂要卷之十一